

**REGIONAL NEWS BULLETIN**  
**HEADLINES (EVENING)**

**Date – 12/01/2025**

**Time - 18:30 Hrs**

1. Vaitin khaw bul Tuiruang luia chesual mi 2 zinga pakhat zawk ruang ,vawiin chawhnu khan hmuh a ni.
2. Nikum chung khan Mizoram Police-ten cheng vaibelchhe 211 leh nuai 64 chuang hu ruihhlo an man.
3. Assam-ah naute thla 10 mi, HMPV kai hmuhchhuah a ni.
4. Prime Minister Narendra Modi-a'n thalaite tha chakna hmangin India chu ram hmasawn a ni thuai ang, a ti.

<><><>

**DROWNED**

Vaitin khaw bula Tuiruang luia chesual mi 2 zinga pakhat zawk Pu Lalditsaka, kum 32 ruang chu vawiin chawhnu dar 1:25 khan hmuh a ni.

Vaitin VCP Pu Thanhkira hnen atanga thu dawn danin, Tuiruang luia sangha man tura chhuak Vanlalhnuaia (kum 28) leh Lalditsaka (Kum 32) te hi January ni 8, Nilaini tukthuan eikhama chhuak an ni a. Tuiruang hnaivai a cheng te pawhin an hmuh thu sawiin Nilaini tlaiyah sangha an man lai hmutu an awm a. VCP sawi danin Vanlalhnuaia leh Lalditsaka te hi an chungte'n an biak pawh theih loh avangin an mangangin a tukah midang an pun a. Ningani-ah mi thenkhat zawng tura chhuak chuan Lui bul hnaiah an thawmhnaw leh an sangha man thenkhat an hmu tih sawiin anmahni erawh hmuh tur an awm lova ,Tuiruang luiah an tla a nih ringin khawtlangin Zirtawpni atang khan an zawng tan ani.

Vaitin khawtlang leh a chheh vel khua atanga tlawmngaia thawkchhuak te hian theih tawpa lawng hmangte-a an zawn laiin, vawiin chawhnu khan an tlakna hmun a ngaih Vaitin kai thlang, suar tawpah Pu Lalditsaka ruang hi a rawn langchhuak a. An khua Vaitin panpui nghal in, Sakawrdai PHC-ah postmortem tih a ni anga, zaninah vuiliam nghal a nih tur thu Vaitin VCP chuan a sawi.

Pu Vanlalhnuaia hi zawn chhonzawm zel a ni a, khawtlang ang chuan ni sarikh chung zawn chhonzawm a ni ang a, thil awmdan azirin, a nawlpui anga zawn chu harsa deuh mahse tlawmngai theite chuan la zawn chhonzawm zel an tum thu a sawi a ni.

<><><>

**MYANMAR STUDENTS**

Mizoram lam, a bikin Zokhawthar khaw sikul hrang hranga Myanmar zirlai sikul rawn kaite chuan khuahkhirhna karah tluang takin sikul an kal thei.

Kar kal ta Zirtawpni khan thlasik chawlh zovin Mizorama sikul zawng zawng hawn tan leh a ni a. Assam Rifles hovin ramri a mihring inkalpawh chungchangah harsatna an siam thar avangin sikul kai tan ni hian zirlaite'n ramri kan chungchangah harsatna an neih an hlauhthawnpui hle na-in harsatna awm lovin sikul an kai a, an ban hunah ramri an kan leh thei a ni. Zokhawthar khawtlang hruaitute'n Akashvani Aizawl an hrilh danin Myanmara Chin state, Mizoram depa khaw awm, Khawmawi, Rihkhawdar leh a chhehvel khua atanga Zokhawthar sikul hrang hranga sikul rawn kai hi mi 500 chuang an ni a. Primary school, middle school, high school leh higher secondary school zirlaite an ni. Zingah Mizoram lama sikul kai turin Tiau lui chung lei dawh rawn kaltlangin sikul banah he lei hmang tho hian an khaw lamah an kir leh thin a ni.

Zokhawthar khawtlang hruaitute sawi danin January ni 1 atang khan Assam Rifles sipaite'n chung lam an hotute thu hmu ni a insawi-in ramri a inkalpawh chungchangah lehkha an siamsakte lo chu an chhuah duh lova. Champai district mite chauh Myanmar lama luh phalna an pe bawk a, hemi avang hian zirlai 500 chuang zet hian harsatna an tawh an hlau hle. Mahse, sikul kai tan ni hian engmah harsatna awm lovin an rawn lut a, an haw leh thei niin khawtlang hruaitute chuan an sawi a ni.

Nikum hmasa lama ramri hrul vela Myanmar sipaite leh sipai sorkarna duh lova dodaltu pawlte an inkah nasat avang leh indo thlawhnate'n he'ng lai khuate hi an rawn bomb reng avangin raltlan kir chho lehte pawhin an fate zirna a khaihlak loh na'n Mizoram lamah an fate sikul an kaltir hlawm a. Tunah hian academic session a la zawh loh avangin an la kaltir zawm ta zel a ni.

<><><>

## **FIREWORKS**

Nikum December ni 31 zana kum hlui thlah leh kum thar lawmna a halpuah, halmawi leh a kaihhnawih hal chungchangah thubuai 56 ziahluh a ni tawh.

Police hotute hnen atanga thudawn danin sorkarin halpuah leh halmawi hal khapna thupek bawhchhiate hi chhui chian zui zel an ni a, thubuai 56 ziahluh anih tawh bakah hian mi 65 man an ni tawh a, thubuai hi ziahluh ni mah se, bail theih dan bawhchhiatna a nih avangin bail a chhuah leh nghal zel an ni . Halpuah, halmawi leh meithallawn hal lui mi 37 man chhuah an ni a, thupek bawhchhia a lo kawl chungchangah thubuai 19 ziah lu h a ni. Mi mante hi Aizawl district-ah tam berin mi 54 an ni, Lunglei district-ah mi 12 leh Champhai district-ah mi 8,Kolasib leh Serchhip-ah mi 1 ve ve man an ni baw k a ni.

Krismas leh kumthar vuakveta halpuah, halmawi leh a behbawm kaw l chungchanga mante hnen atanga an thil man hlutna belhkhawm hi cheng nuai 24 chuang hu a tling a. Thupek bawhchhia la chhui zui mek 5 a awm baw k.

<><><>

## **POLICE DRUG SEIZURE**

Nikum, 2024 chung khan Mizoram Police-te chuan cheng vaibelchhe 211 leh nuai 64 chuang hu ruihhlo an man.

Police hotute'n Akashvani Aizawl an hril danin nikum chhung khan heroin kg. 80 leh gram 856 an man a, an heroin man hi cheng vaibelchhe 24 leh nuai 25 chuang hu a chhut a ni a. Heroin tawlhruk, kaw l leh hralh chungchangah hian Narcotic Drugs & Psychotropic Substances Act, 1985 hnuai a thubuai 282 ziaklutin a inhnamnawih a puh mi 388 an man a ni. Nikum chhung vek hian Police-te'n Crystal meth kg. 35 leh gram 155 cheng vaibelchhe 105 leh nuai 46 chuang hu an man. Hemi kaihhnawihah hian ND&PS Act hnuai a thubuai 4 ziaklutin mi 3 an man a, methamphetamine pawh kg. 627 leh gram 741, cheng vaibelchhe 81 leh nuai 61 chuang hu an man a. Methamphetamine kaihhnawihah mi 51 an man a, ND&PS Act hmangin thubuai 30 ziahluh a ni. Nikum chhunga ruihhlo kaihhnawih a ND&PS Act hmanga thubuai ziahluh zawng zawng hi 339 a ni a, mi 468 man an ni.

Heng bakah hian caffeine kg. 1,075, cheng nuai 15 leh sing 6 hu an man a, Ganja kg. 305 leh gram 387, cheng nuai 15 chuang hret hu bakah damdawi pangngai, thalaite'n an hman sual nasat codeine telna, khuh damdawi leh alprazolam cheng nuai khan chuang hu an man baw k.

Excise & narcotics department pawhin nikum chhung khan heroin kg. 46 leh gram 566 leh methamphetamine kg. 138 leh gram 817 an man a. Mizorama ruihhlo dona dan kengkawhtu department 2-te'n nikuma an man belhkhawm hi heroin kg. 127 leh gram 455 leh methamphetamine kg. 766 leh gram 558 a tling a. Kum kalta a mante nena khaikhinin an tam tam fal hle a ni.

Hetih lai hian nikum chhung khan ruihhlo hmansual vangin Mizoramah mi 71 an thi a, thite hi mipa 60 leh hmeichhia 11 an ni a.

<><><>

## **AIR NEWS ON SOCIAL MEDIA**

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni. Naktuk zing dar 7 leh a chanve-ah Chanchinthar puan leh a ni ang.

<><><>

## **HMPV CASE IN ASSAM**

Assam-ah human metapneumovirus (HMPV) kai pakhat hmuhchhuah a ni a, hri kai hi nauthe thla 10 mi niin Dibrugarh-a Assam Medical College & Hospital-ah enkawl mek a ni a, a dinhmun a ngaihtuahawm loh nia sawi a ni.

State Health Minister, Ashok Singhal-a chuan hri leng thei hmachhawn turin sorkarin ruahmanna engkim a peihfel tih a sawi a ni.

<><><>

## **VIKSIT BHARAT**

Prime Minister Narendra Modi-a'n thalaite tha chakna hmangin India chu ram hmasawn a ni thuai ang, a ti. New Delhi Bharat Mandapam-a vawiina Viksit Bharat Young Leaders Dialogue 2025 a hmanpuinaah he thu hi sawiin India ram thalai-te avangin thil tam tak a in thlak danglam tawh, a ti a, chhuan thar lo awm turah rinna a nghah thu sawiin he chhuan tharte hian harsatna hrang hrang chinfel dan tur an rawn hrechhuak dawn a ni, a ti.

Zirtawpni atanga tan, ni thum awh, Viksit Bharat Young Leaders Dialogue-ah hian thalaiten ram hmasawn, Viksit Bharat nih theihna tur atana thil pawimawh nia an hriatte an tarlang a, intawhkhawm neih chung hian ramchung hmun hrang hrang atanga fuankhawm, thalai rual sang 3 te chu Pu Modi-a nen inkawmhona an nei thin a ni.

<><><>

**LOS ANGELES WILDFIRES**

United States-a Los Angeles khawpui chhehvela ram kang chu thelh mih a la ni lova, hriat theih chinah mi 16 an thi tawh a, Palisades zone-ah mi 5, Eaton zone-ah mi 11 an thi a ni.

Kangmei hi Los Angeles chhehvel, Eaton, Hurst, Kenneth leh Palisades-ah te a chhuak a, ram acre 38,276 vel a kang tawh a ni. Chenna in sing 1 sang 2 chuang a kang chhe tawh a, ram a kan belh zel avangin mi nuai 1 chuang, hmun him lama insaseng tura hriattir an ni a, tunkar Nilaini thleng, thli na tak thaw zui tura ngaih anih avangin kangmei hi a darh zau zel hlauhthawna a lian hle a ni.

<><><>